

**KJ: Kerajaan perlu adil, telus dalam pemberian projek  
Malaysiakini.com  
August 26, 2010**

Kerajaan mesti bersikap adil dan telus dalam pemberian projek pembangunan bagi menarik minat pelabur swasta, kata Ketua Pergerakan Pemuda Umno Khairy Jamaluddin.

"Kerajaan perlu membuktikan bahawa peluang mendapatkan projek pembangunan akan diberikan kepada syarikat yang menawarkan harga serta nilai terbaik kepada kerajaan dan ia perlu dibuat secara terbuka dan telus.

"Sama ada penswastaaan pangkalan udara (Tentera Udara Diraja Malaysia di Sungai Besi) atau penswastaaan Institut Penyelidikan Getah di Sungai Buloh, semua pemberian projek tersebut mesti dibuat secara terbuka dan telus," katanya.

Khairy yang juga ahli parlimen Rembau berkata demikian pada Forum Ramadan 2010 anjuran majalah The Leaders di Kuala Lumpur, petang semalam, yang turut disertai ahli parlimen Shah Alam Khalid Samad.

Sementara itu, Khalid berkata kerajaan perlu melaksanakan sistem ekonomi yang lebih liberal dan telus, bebas daripada campur tangan politik dan amalan kronisme.

"Jika kita masih mengharapkan pelabur asing membelanjakan wang mereka di sini, bagaimana ia boleh dilakukan jika kita tidak tahu siapa yang membangunkan tanah pangkalan udara Sungai Besi atau tapak di mana Penjara Pudu pernah ditempatkan?" katanya.

- Bernama

Copyright © 1999-2007 Mkini Dotcom Sdn. Bhd.  
Source : <http://www.malaysiakini.com/news/141120>